

Sur fossa da Luis Peder, Cavorgia

13.06.1926 - 26.07.2005

Venderdis, ils 29 da fenadur han parents, vischins ed enconuschents priu comiau dil davos habitont permanent da Cavorgia. En in temps da strusch treis meins ha il bien Luis treis da ses frars che han bandunau il mund terrester. Ina greva frida pil car defunct. Stgirs dis ein sedera-sai sur dad el e spossau il Luis bravamein. Il defunct ei staus in sempel e survetscheivel um da siu fatg, cun in da far ch'ei dat mo paucs denter nus. El ha viviu ina veta ora en la biala ucliva da Cavorgia e partiu siu da casa cun ils frars Martin e Nazi. Il Luis fuva sco da dir igl um da casa, el haveva da cuschinlar e far il percasa e mintgaton entupavan ins el a Sedrun per far las commissiuns. Dasperas segidava el vid il bein puril. Denton ils davos 10 onns entupavan ins il Luis plitost mo giun Cavorgia. Ussa dapi in onn ch'el era tut persuls a casa ei el staus sfurzaus da se-render da temps en temps a Sedrun per far sias fatschentas. Suenter la mort da ses frars sesenteva el ualти persuls ed isolaus, mo tuttina era el cuntents en siu da casa. Il Luis fuss buca staus prompts da bandunar sia casa e serender en casa da vegls. El maniava, el vegni schon da serugalar, da cuschinlar seigi el endisaus e per gl'auter ses dus giats, quels sappi el buca schar tut persuls, enzatgi stopi bein star cheu e mirar dad els. Da l'autra vart sefi-

dava il bien Luis denton era da ses buns vischins. Gie, el scheva: Ils vischins segidan era, quei va schon. Il Luis pudeva far mintga di ina pintga spassegiada e haveva plascher sch'el s'entupava cun enzatgi e saveva dar ina pintga paterlada. Dapi in temps sesenteva el buca propi bein, Luis encurscheva ch'ei mava plau-net da rendiu cun el. La glisch da quest mund era sin sestizzar, quei haveva el era dau dad entelir a ses vischins. Ils vischins han priu per senn quei e giu cor ed egl aviert pil car convischin Luis. Aschia ch'els han enderschiu ils 26 da fenadur ch'il Luis haveva buca bandunau sia casa. Ils vischins han lu beingleiti mirau nua ch'el seigi e prest anflau el en siu letg sedurmentaus. Igl aunghel dalla mort era staus sin viseta en la casa dils Peders e priu il davos frar a casa. Bein ina grazia tut speciala che Niessegner ha regalau al car Luis. Siu fervent giavisch da saver sedurmentar en siu sempel e carezau ambient nua ch'el ha viviu ina veta ora ei ius en vigur.

Car Luis, «Mo la glisch da quest mund ei stizzada, nova tarlischur senza quitaus e panzieris retscheiva Tei».

Ruausa en pasch
Margrith Cavegn-Flury